

Azharishah menang Anugerah Olahragawan UMP

PENCAPAIAN cemerlang dalam sukan olahraga dan meraih pingat bagi Kejohanan Sukan Institut Pendidikan Tinggi (SUKIPT) dan Kejohanan Olahraga Masum 2016 melayakkan Muhammad Azharishah Satar merangkul Anugerah Olahragawan pada Majlis Malam Penghargaan Sukan UMP yang berlangsung di Dewan Astaka **Universiti Malaysia Pahang (UMP)**.

Bagi Olahragawati pula dimenangi oleh Cheong Pui Kei dari Fakulti Teknologi Kejuruteraan menerusi sukan tekwando. Pemenang membawa pulang trofi, sijil penghargaan dan wang tunai RM500.

Naib Canselor UMP, Profesor Datuk Dr Daing Nasir berkata, UMP meraikan kejayaan dan kecemerlangan atlet yang berjaya mencurahkan bakti mengharumkan nama UMP dalam bidang sukan sepanjang tahun 2016.

"Pada tahun lalu seramai 11 atlet UMP menyertai Sukan Malaysia 2016 (Sukma) di Sarawak yang telah terpilih mewakili beberapa buah negeri seperti Pahang, Wilayah Persekutuan, Selangor, Terengganu dan Sarawak menerusi sukan boling padang, memanah, petanque, renang, tekwando dan karate.

"Selain itu atlet bola keranjang UMP juga berjaya mewakili Malaysia dalam Sukan Asean pada tahun lalu," katanya pada majlis penyampaian Malam Penghargaan Sukan UMP, baru-baru ini.



Mohammad Azharishah dan Pui Kei bangga menerima anugerah masing-masing.

Hadir sama, Pengarah Majlis Sukan Pahang, Mohamed Rashdan Mohamed Razali, Pendaftar UMP, Abd Hamid Majid dan Pengarah Pusat Sukan dan Kebudayaan UMP, Abd Rahman Safie.

Malam penghargaan edisi kelima itu adalah wadah meningkatkan penglibatan pelajar UMP yang mengharumkan nama universiti di peringkat kebangsaan mahupun antarabangsa.

Sementara itu, Mohammad Azharishah berkata, anugerah itu amat berharga dan menjadi pemangkin semangat untuknya lebih cemerlang dalam sukan pada masa akan datang.